

Ahmad Shabery dihalang ke program BN di Permatang Pauh
Utusan Online
26 Mac, 2012

BUKIT MERTA JAM 25 Mac - Ahli Majlis Tertinggi UMNO, Datuk Seri Ahmad Shabery Cheek mengakui terkejut dengan tindakan penyokong pembangkang yang menghalang beliau daripada menghadiri program Gelombang Biru anjuran Barisan Nasional (BN) di Politeknik Seberang Perai (PSP), kelmarin.

Menurut beliau, tindakan itu mungkin diambil oleh penyokong pembangkang yang berasa terancam kerana BN mengadakan program di kubu kuat Ketua Pembangkang, Datuk Seri Anwar Ibrahim iaitu di kawasan Parlimen Permatang Pauh.

"Saya pun hampir-hampir tidak hadir selepas dinasihati tetapi Alhamdulillah semuanya selamat. Saya rasa dia (Anwar) mula berasa kedudukannya semakin terancam. Dia rasa akan kalah di tempat sendiri," katanya.

Beliau berkata demikian kepada pemberita selepas melancarkan program Gelombang Biru Pilihan Raya Umum Ke-13 peringkat Parlimen Permatang Pauh, di sini kelmarin.

Dalam kejadian itu, Ahmad Shabery yang hadir untuk merasmikan program Gelombang Biru di PSP dihalang memasuki pekarangan premis tersebut oleh sekumpulan ahli pembangkang.

Kira-kira 100 ahli kumpulan tersebut kebanyakannya daripada Pas berdiri di depan pintu utama institusi pengajian tinggi awam (IPTA) itu sambil memegang sepanduk bagi menghalang kenderaan yang mahu masuk.

Difahamkan penyokong pembangkang itu tidak berpuas hati kerana program BN tersebut diadakan di IPTA.

Bagaimanapun, Ahmad Shabery berjaya menghadiri program itu hasil kecekapan pemandu peribadinya menggunakan laluan masuk yang lain.

Terdahulu, pihak pengurusan PSP terpaksa menutup pintu pagar bagi mengelak sebarang kejadian tidak diingini selepas keadaan dilihat semakin 'panas'.

Keadaan kecoh itu akhirnya dapat dikawal dan dipulihkan selepas campur tangan polis.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0326&pub=Utusan_Malaysia&sec=Politik&pg=po_04.htm